

西北文學文獻

第七卷

中國西北文獻叢書



中國西北文獻叢書·第六輯

西北文獻

第七卷



新學
PDF

關 中 李 二 曲
先 生 全 集

序

儒者之學所以順陰陽明教化凡天地終始之端仁義道德之理死生性命之分成敗理亂之經莫不修之於身而措之於事及其被於物而栽培長育以成就之也如江海之浸膏脂

之潤渙然怡然相率於不自知蓋以
學術而正人心其重且大如此蓋屋
李先生以理學倡關中以躬行實踐
爲先務自人倫日用語默動靜無一
不軌於聖賢中正之說而尤以悔過
自新一語爲學者入德之門建瓴挈

綱發矇起瞶學者或親受業於先生
或聞先生之緒餘而私淑向往者幾
遍天下也予嘗考有宋諸儒及元明
以來相承之次第爲學之本末文章
之同異蓋三致意焉而先生亦言之
詳矣謹之於視聽言動由之於學問

思辨博文約禮下學上達循序以致
精者考亭之學也先之以立大本繼
之以求放心曰易簡曰覺悟其後良
知之繼興使人靜時常覺動時常定
澄瑩本體以去其逐物之流者則自
金谿以至姚江之學也顧其詆訶齟

齒則以着意精微爲陸沉以留心傳
註爲榛塞訓詁支離考辨玩物重爲
朱門遺議而攻象山陽明之短者以
其守虛無之說昧天理之真詆訾聖
賢捐棄經典甚至大乘上根聖胎聖
果直筆於書是口談東魯而手援西

竺此流分派別之所以異也然朱子
之學先之以窮理要之以居敬歸之
以主一淳熙中還自浙東見士習馳
驚於外每語學者以孟子道性善及
求放心兩章務收歛凝定又與何叔
京書以爲靜中湏體認大本未發時

氣象分明此龜山門下相傳指訣深
悔當時方好章句訓詁之習無一的
實見處則亦未嘗不合於象山之說
而觀象山文集所載又未嘗不教其
徒讀書其亟所稱述以誨人者曰居
處恭執事敬與人忠曰克己復禮曰

萬物皆備於我反身而誠樂莫大焉
陽明之在螺川與諸生談論謂吾儕
以困勉之資而悠悠蕩蕩坐享生知
安行之成功豈不誤已又曰良知之
妙真是周流六虛變動不居若假以
文過飾非爲害至大此時亦似隱隱

已知流弊而漸還轅於新安矣此歧
途合轍之所以同也今先生會萃群
儒之說而折衷之竟獨見其大要以
尊德性爲本體以道問學爲工夫兼
盡姚江考亭之旨先生之言曰末流
多玩實致者鮮往往舍下學而希上

達矢之恍惚虛寂故湏救之以考亭
而世之闢姚江至諱言上達惟以見
聞淵博辨訂精密爲學問之極有稍
知向裏者又祇以克伐怨欲不行爲
究竟大本大原類多茫然亦非所以
善學考亭也觀此則可以知先生修

已立教之大凡矣曩者毘陵守駱公
敦請先生講學江左時予令驥沙得
晨夕奉教深與定交別後先生德愈
邵道益尊爲

思之所重屢徵不起惟孜孜以闡明學
術救正人心爲至急歲辛未高子嵩

侶視學秦闢究心理學因式廬而請
見焉適先生及門高第弟子王爾緝
心敬藁先生散藁成集遂捐俸付剞
劂癸酉冬刊成屬予序其簡端程子曰
聖人之學不傳則無真儒無真儒則
天下貿貿焉莫知所之矣世有先生

學者考道問業因以上追闕閩濂洛
之遺緒其有功於人心學術者顧不
大歟因書此以質之先生

康熙甲戌之孟春閩中鄭重拜題



